

BOARD OF EDITORS

Rev. Dr. Zôdau (Chief Editor)
Rev. Vâzilai (Editor)
Rev. Pahmo (Editor)

KRIZYHPA TLÂAWNA



November 2017

ACHHÔH BIEZY

- 1 Editorial
- 2 Atahmâ hlâ Awnanopa Thâtih
- 9 America MEC Âduana
- 13 Rev. Joseph Mara Zalei
- 15 *Sermon*: Haosa lâ Chaka Suh vy
- 20 Mission Golden Jubilee Kyhchhi Report
- 27 Mara Holy Bible Diamond Jubilee Kyhchhi Report
- 31 *Article*: Hawtizy Pachuna Phapa
- 34 Chakaotuhpazy Taokheina

An Organ of the Mara Evangelical Church
Headquarters : Lailenpi/Sabawngpi
Matupi Township, Chin state

Editorial



Alei nata avâ azaona achie hâpa pazao heih awpa ta Khazohpa ta a Sawchapaw matlupa Zisu Krista khizaw lâta a vaw tuah. Paw Khazohpa thatih cha Sawchapawpa tawhta pahno theipa a châ. Chavâta Bei Zisu cha Varâh bieparupa khizaw lâta tlâawkheituhpa a châ. Awnanopa cha Krista Thatihpha Tlâawkheituhpa a châpa hawhta, Mara Awnanopa chhaota sahlao zydua lâta Thatih apatheisana cha “Krizyhpâ Tlâawna” he a châ.

Mara Awnanopa nôpaw hmiatuapazy ta Krizyhpâ Tlâawna he vaw papua tyh eita, awnanopa ta thôkhei kaw. Châhrasala rairuna vâta kô hluhpi chhôn vaw papua thei khao mapi. Atakô 2017 tawh heta kô kha ta achyh chai ta, eino papua thei bâ awpa ta patohpatiapa a châ.

2016-2020 term he Mara Awnanopa châta term peimawh kawpa, Golden Term, Jubilee Term a châ. He term chhôn liata Mission Golden Jubilee, KHP Golden Jubilee, Mara Holy Bible Diamond Jubilee, Khumi Evangelical Association (KEA) Golden Jubilee, Mro & Myo Evangelical Mission Golden Jubilee, Laymyo Evangelical Mission Golden Jubilee-zy eima tao aw. Chavâta he term he “ABeipa Palôhtlâhna term” chhao a châ hra. He kôzy liata awnanopazy byhna to aw eita, Khazohpa Moh chhao eima parônahsa chaina kôzy a châ hra aw.

Atahma ta Krizyhpâ Tlâawna liata 2017 March tawhta October taihta eima awnanopa chakaona tlâhpiapazy palasapa a châ. He thla 8 chhôn liata eima Awnanopa thatih, Kyhchhi peimawhpa taopazy, khichhôn awnanopa thokha paduana thatih, Awnanopa nôpawpa thokhazy thatih, thlahpa lâta eima

nôpaw thokhazy Thatihpha ama phuahpa, ngiapâtuhpâ ta ama tao awpa khokheina, bietana nata Krista liata miah pahasaipa awnanopa nôpawpa thokhazy thatih ropa a châ.

Ngiapâtuhpazy hro pasana cha Krista Thatihpha a châ. Khazohpa bie pahno rili, ngiapâtuhpâ hro laiseih rili tahpa a châ. Chahawhnachata Awnanopa thatlôna, laiseihna nata apôhkhana cha Awnanopa a sie haipa thatih pahnona liata âpahnieh. Cha hawh tlai ta, “Krizyhpâ Tlâawna” cha he ângiahna pabie thei nawpa ta papuapa a châ.

Krista chakaona liata

*Rev. Dr. L. B. Siama
General Secretary*

EIMA AWNANOPA THÂTIH

1. HOME EVANGELIST TRAINING: March 24-26, 2017 ta Home Evangelist Training cha MEC Hqrs. Sabyhpi liata hneipa a châ. Cha liata Evangelist mo 12 ama vaw tlô thei. Cha training liata Rev. L.B. Siana ta Keynote address reina a hnei. Cha liata paper reipa zy cha (1) Rev. Dr. Zôdau: Achhyna ryhpa; (2) Machâ Zasaw: Awnanopa nata sôh mohôhna; nata (3) Rev. Victor Veu: Awnano Phapa zy reina ama hnei. Achhuahna: awnanopa phapa tao awpa châta, cha cha arylâpazy ta a chadai awpa a châ.

- (1) Ahrapa Awnanopa pachâsa awpa;
- (2) Khazohpa achhyna liata laiseihna;
- (3) Khazohpa bie nata hla liata a laiseih awpa;
- (4) Sôh thyuna/mohôhna ngâchhihpa awnanopa padua awpa;
- (5) Chhôhkha maihsa padua lyma awpa;
- (6) Mission chakaona a pahâhpa awnanopa padua lyma awpa;
- (7) Thla achhapa awnanopa padua lyma awpa;
- (8) Dâh nata ryhpa papeimawhsapa awnanopa padua awpa;
- (9) Kyhpachana rai a hriapa awnanopa padua lyma awpa;
- (10) Paritheipa nata pa-ôpazy hmâh leipa Awnanopa padua awpa

Kôchhoh Home evangelisty ama chakaona liata biepipa cha “Thlahpa nata hmeihsehpa ta khazohpa achhyna” (Zawhana 4:24) a châ.



2. KHP GOLDEN JUBILEE: April 1-2, 2017 liata MEC KHP Golden Jubilee kyhchhi cha Lialaipei Vaihpi local church liata taopa a châ. Cha kyhchhi châta bietlâhpi cha “Ei pasô chaipa reingiana” (Phil. 2:8). Khichhai a tlô theipa maluh cha 1800 ama châ. Cha liata pastorzy mo 8 ama tlô thei hra. KHP Golden Jubilee athei-thlâhna lôbô cha MEC Hqrs. Lialaipei compound chhôn liata bôpa châ ta, Lôbô bôna service cha Rev. Beilawkhai (KHP Secretary) ta siekhei ta Rev. Dr.



L.B. Siama ta reih ta, Rev. C. Sitlô (KHP Concern Secy.) ta pahyna a hnei. KHP Jubilee kyhchhi liata hlasa thaipa St. David Lai, St. Pakhai nata Sayama Chit Su Shwe zy chhao ama hlao hra. Kyhchhi thapha alyna ta eima hma nga nota vadua kawpa ta hawti Beihmausae, Patheitlah cha kyhchhi a vaw hlaona liata Motor a piepasina vâta maniah a paha sai.

3. SAWHKHĀ/NGOs NATA AWNANOPA RAIHRIAPAZY A TYHNA: April 19-20, 2017 ta Lialaipei A local church liata Sawkhâ/NGOs nata Awnanopa raihriapazy a tyhna hnei pa a châ. Atlô theipa maluh 52 ama châ. “Nâ byhnâ vaw châ ma y (Ath. 12:3)” bietlâh hmapa ta paper reina hnei pa a châ. Paper a reihtuhpazy cha: Rev. Dr. Zodau, Dr. Kyaw nata Dr. Myat, Sayakyi Seihnai, Mch. Sabei (Mindat) nata Mch. Zasaw (Treasurer, MEC) zy ama cha. Cha atyhna ta â chhuah chaipa cha sawkhâ rai a hriapazy NGO liata rai a hriapazy, nata awnanopa liata rai a hriapazy ta thakha tla ta Mara community nata Mara awnanopazy châta kheita rai ama hria thei via aw tahpa a châ. Cha liata rei viapazy cha:

- (1) COME sikul he kheita eima padua pakhua thei aw?
- (2) Lorrain Aid eima hnei tyhpa he kheita Lorrain Scholarship lâta thlaipa ta education foundation ta eima tao thei aw?
- (3) Maraland Education Day he kheita a yzie hnei viapa ta eima tao pazao lyma thei aw?
- (4) Awnanopa sôh ama thyu pha thei via nawpa ta kheita eima hriapazih aw? – tahpazy a châ. He Sawhkhâ/NGOs nata Awnanopa (SNA) raihriapazy a tyhna he Sawhkhâ, Awnanopa nata NGOs (SAN) raihriapazy atyhna lâta moh thlai awpa khona chhao ama rei pa hra.



4. MARA HOLY BIBLE DIAMOND JUBLEE: April 29-30, 2017 ta Mara Holy Bible Diamond Jubilee cha Chin State khihpi Hiakha khih liata a rôhna kawpa ta taopa a cha. Akichai viapa page (.....) liata moh ma y.

5. MEC-ECM JOINT MEETING: MEC nata ECM akaona nata chakao hmasie via lyma thei nawpa ta August 26, 2017 noh ta Joint meeting cha ECM Headquarters, Siaha liata hneipa a châ. MEC tawhta Rev. Satu Ve U, Rev. Dr. L. B. Siana, Rev. Rakhai, Rev. Sitlô, Rev. K. Zahne nata Machâ Zasaw-zy ama hlao. ECM

Awnanopa tawhta Rev. Dr.Laiu Fachhaih, Rev. Dr. Zawsî, Rev. T. Salaw, Rev. Phosa Choza, Rev. Ch. Chhama, Machâ T. Lala, nata Machâ A. Khailua-zy ama hlao. 2018 tawhta ECM nata MEC joint Meeting he kô kha ta ei no lyma hneipa châ sala, Mara Literature Hmâsiena seminar tao awpa, Pakao liata Lorrain Mothlih Thlahchhana o sa awpa, Interdenominational Mara Christian Literature Committee zy padua awpa ta khokheina piepa a châ.



6. COME: COME sikul cha 2016-2017 academic year liata vaw pahy pazao thei khao leipa châta chyhsa hluhpi khokheina vâta 2017-2018 academic year liata Boarding system ta pahy hawpa a cha. Py 10 miakha deita ta pahy chypa a cha. Sikul hawti maluh chanô 38 nata chapaw 37 ama zydua 75 ama pha. Cha liata Principal châta Sayakyi Tôma; pacutuhpazy châta Saya Taikha; Saya Hlakhai, Sayama Grace Maydi, Sya Zakie, nata Saya Tha-u zy ama châ. Atakô 2017-18 academic ta ama râpasuapa cha 100 liata 100 ezapa zydua pass thei awpa. COME sikul ta achhuahna cha “hrozie amopâtlahpa chhithatuh ngâchhihpa padua awpa” a châ. COME sikul châta thlachha lyma awpa ta eima cha haw.



7. STAFF TRAINING: 2017 September 13-15 (noh thôh) chhòh MEC Headquarters, Sabyhpi liata Staff Training taopa a châ. Cha training liata Lialaipei Office tawhta staff (9), Sabyhpi Office tawhta staff (7), Ngephpepi Office tawhta Staff mo (2), Department secretary (2), Biatuhpa pastor (1), MEC Office Bearers (7), zydua (28) ama hlao.

Cha training liata he hawhta achuna hneipa a châ:

- (1) Khazohpa Biehraï Bie hawhta chakaona (Rev. Dr. Zodau)
- (2) Thlahpa ta Chakaona (Rev. Rakhai)
- (3) Staff-zy raihria nata chhòhka ativyna (Machâ Zasaw)
- (4) Staff-zy raihria saipazina (Rev. Dr. L. B. Siama)
- (5) MEC Service Rule (Rev. Satu Ve-U)
- (6) Staff zy hro liata pahno awpa peimawhpazy (Rev. C. Sitlô)



8. MORA THLICHHIEPA BAONA: 2017 chhòh April nata June thla zy liata Mora thlihchhiepa vâta eima Mara râh chhòh khi thokhazy cha ama achhyna ozy, sikulzy, nata ozy a parao. Chavâta Myanmar Lutheran Service baokhâna vâta Lutheran World Federation (LWF) tawhta baona khi 17 liata a ypa odyh 131 châta baona phusa tei 178 MMK hmôpa a châ. Chavâta LWF chôta alyna bie eima reih.

9. Kô 500 REFORMATION TLOHNA AHMANA: October 21, 2017 ta Awnanopa reformation kô 500 tlohna cha Central Hotel, Yangon liata taopa a châ. Cha liata MEC awnanopa tawhta mo 40 ahlaio theipa a cha. Prof. Dr. Jan Martin Depner , LTS Hong Kong ta paper reina ahnei. Prof. Dr. Philip Baker, Regional Representative for Asia of the ELCA, USA ta Khazohpa bie phuahna a hnei. St. David Lai ta Abeipa reithai hla ao ngaia kawpa ahnei. Khychhi a vaw hlaio theipa maluh 220 ama pha. Achhyna service khai ta zawpi dua ta zâpati akaona hneipa a châ.



AMERICA MEC ÂDUANA THÂTIH

Rev. Châ U Hlychho



1. MEC Local Church paduana nata Bia pachhaina

2000 kô rachhôn tawhta Mara rân puasaipa ta Mara saw thokha zy cha khihsa-tôhtuna ryhpao viana su lâ a pasie hôlô eita America rân taihta khisa awpa ta ama tlô haw. Châhrasala cha rân a tlô tuapa Mara sawzy maluh ama chyh kaw chypa vâta Mara awnanopa MEC padua thei mâh leipa eita, amo nata zyna a chakhia leipa awnanopa phupy liata ama vaw pakhy tyh.

Kô vaw sie via laihta 2010 a vaw pha na ta MEC padua thei awpata maluh ama vaw pôh via habapa vâta 2009 MEC Assembly ta rân hro lâ liata a pahrapa Marasaw zy MEC padua thei awpata khokheina a piepa hawhta nata cha kyh nata azaopata cha daihti no ta GS a hriapa Rev. Victor Ve-u ta America rân liata MEC paduana hmah la awpata D. Min achu awpata USA lâ a siepa Saya Chou Hlychho nata LTC liata Principal a hriapa Rev. Dr. LB Siana hnôhta châ a pie ei.

GS châ piepa hriapazih awpa ta 2010 kô ta USA liata taopa WCRC Assembly a hlaopa Rev. Dr. LB. Siana ta Saya Chou Hlychho hnôhta Mara awnanopa duahmo nata thâti achu ta, hmo yzie a pahno khai tawhta ano chhithapa ta July 4, 2010 noh ta

Baltimore khipi, Maryland State liata Amarica, Mara Evangelical Church cha Abeipa moh ta paduapa acha. Amo chhao **Mara Evangelical Church in America (MECA)** tahpa ta moh biepa châ ta, he he America râh liata padua tuachaipa MEC Local Church a vaw a cha haw. Cha daihti liata awnanopa malu cha 30 ama châ.

Cha khai tawhta Marasaw zy maluh hlüh via ta khih ama sana State maih ta Abeipa moh ta MEC local church a vaw dua lai lymâ. January 19, 2013 noh ta MEC North Carolina, March 3, 2013 noh ta MEC Indiana, June 16, 2013 noh ta MEC Colorado, April 20, 2014 noh ta MEC Georgia, July 24, 2016 noh ta MEC Iowa, January 1, 2017 noh ta MEC Texas nata January 21, 2017 noh ta MEC Kentucky zy â vaw duah.

America râh liata State 50 nata District sakha (Washington DC, DC – District of Columbia tahpa ta pahnopa) y ta MEC local church zycha Amarica râh chho-nochhi (South East) lâ chhah State sa 8 liata paduapa a cha. Awnanopa maluh zydua 1000 hlei pha ei ta, Ordained Pastor mo 4 nata Pro. Pastor mo 1 ama hnei. Pastor bia sa 4 ta pachhaipa chata:

1. MEC Maryland nata MEC Texas biatuhpa Rev. Chou Hlychho
2. MEC Indiana nata MEC Iowa biatuhpa Rev. Daniel T. Hietha
3. MEC Georgia nata MEC Kentucky biatuhpa Rev. Auko Choza
4. MEC North Carolina nata MEC Tennessee biatuhpa Rev. Mara Hrato zy ama a cha.

MEC Tennessee he MEC Colorado tahpa ta pahno tyhpa kha châ ta, Marasaw hlüh via khihsana nata a hla kawna su a cha vâta Marasawzy khihsana nata a hnia viana su Tennessee State lâ ama pasie hawpa vâta local church moh chhao MEC Tennessee tahpa ta pananopa a cha. Pro. Pastor Caleb chakaona su châ ta pastor pitlohpa a châ mâh leipa vâta Rev. Mara Hrato bia liata so chyapa a cha.

2. MECA Church Council paduana

Abeipa chhithana vâta achô liata palâsapa hawhta MEC Local Church a vaw dua lai lymâ ta, amo nata local church chyua ta

y ta a chhitha awpa MEC nôpaw zy ta a pha ama tah leipa vâta Thlahpa nata sapa liata hmaohkha ta chhiekhoh, phakhoh awpa khona vâta MEC Local church zydua a syhpahmaohpa py sa kha kha padua awpa achhuahna ama vaw hnei. Chavata September 7-8, 2013 noh ta MEC Colorado liata Meeting ei (1) pahruapa acha. Meeting ama pahruana cha Abeipa ta hlaotlona byhna pieta America rah liata Local Church to tawta MEC nopaw zydua ta meeting cha ama hlao thei.

Cha daihti rachhôh liata MEC Myanmar tawhta Ph. D achu awpa ta USA lâ a siepa Rev. Sikhaw ta Mara Evangelical Church in America, Church Council a dua thei nawpata ato-atlâh bô kheii ei ta, “Mara Evangelical Church paduana nata mohôh-chhithana tlâhpipa” tapa paper patôhpatia ta a chhitha ei. Cha meeting cha ta ary liata palâsapa zy he a pathlu.

1. MEC local Church zydua akaona py paduapa cha aw ta, cha cha Church Council tahpa acha aw.
2. Kô kha ta ei kha MEC Church Council pakhyipi a y aw.
3. MEC member pakha kha a vaw thi pathlei khiah MEC local church zydua ta ri eima pabu kheii aw. *(USA râh liata a thipa pabuna ma cha \$10000.00 nata \$15000.00 likaw rachhô châta, chhôhkha sakha ta a pabu thei rimâpa achâ lei vâta awnanopa ta a pabu kheipa a châ. He he ta awnanopa member zy thlah thahta a palôh).*

Cha meeting bie pathlupa hawhta rai hriapazih lymapa châ ta, August 29-31, 2014 noh ta MEC Indiana liata Mara Evangelical Church in America Pakhyipi Ei (1) na cha Abeipa moh ta tao theipa a cha. Cha pakhyipi liata Rev. C. Sitlô (Moderator) MEC Assembly vyuhpa ta a hlao ta Pro. Pastor Chou Hlychho cha Pastor pitlohpa châ awpata chahnaona (ordination piena) a hnei. Rev. Chou Hlychho cha America râh liata MEC ordained pastor hmiatua chaipa a cha.

Ei (2) pakhyipi cha September 4-6, 2015 noh ta MEC Colorado liata taopa châta Rev. Satu Ve-u (GS) MEC Assembly vyuhpa ta ahlao ta, Pro. Pastor Daniel T. Hietha nata Pro. Pastor

Mara Hrato zy pastor pitlohpa châta chahnaona a hnei. Ei (3) na Pakhypi cha MEC Maryland liata September 2-4, 2016 noh ta taopa châta, MEC Assembly vyupata Rev. Dr. LB. Siana (GS) ahlao ta Pro. Pastor Auko Choza cha pastor pitlohpa châta chahnaona a hnei. Ei (4) Na Pakhypi cha September 1-3, 2017 noh ta MEC North Carolina liata arôhnah kawpata Abeipa moh ta tao theipa a cha. Ei (1) pakhypi liata pakhypi a hlaotheipa khichhai chhao khichho chhao 200 rachhôn pha eita, ei (4) na pakhypi lia deikua cha khichhai chhao khichho chao 680 hlei ama pha. Abeipa ta MECA awnanopa he byhnâ a pie tahpa he liata a lâpasia hmeisei.

3. Khazohpa Khih nah Râh châta Chakaona

Riethaina hluhpi taona chôta MEC member zy ta America râh liata MEC vaw padua haw hra ei sala atahma cha Abeipa chhithana byhnâ vâta Abeipa khih nah râh châta byhnâ ama vaw châ thei lymâ haw bâ. MEC office lâ sôh pangiana liatazy, Mission chakaona liatazy, SDD chakaona liatazy nata a hro ahropa chakaona chinanopa liatazy Abeipa moh ta a hlao thei lymâ ei ta, tahma ta sa nga haipa Lialaipa khi liata MEC Headquarters o chhao Mara Evangelical Church in America ta budget ting 700.00 MMK taopa ta ama sakheipa a cha.

2010 – 2017 kô he MEC local paduana kô hawhta pachâpa châ ta, 2018 tawhta cha Awnanopa a pohkhana, chakaona liata hmahsiena, thlahpa sapa liata hmahsiena zy MEC Assembly nata akaopa ta hriapazih laih awpa khohna nata achhuahna hneipa a cha.

MECA awnaopa chhithatuhpa zy he ama sapa ko 30 nata 45 rachhôn sai châ taraw ei ta Abeipa Zisu kyh a pachâpa, awnanopa kyh a pachâzy sai ama cha. Ama chakaona liata Abeipa khoHPa hawhta ama chakao thei lymâ nawpata nata awnanopa member khochhihpa zydua Abeipa Zisu ngiapâna nata chakaona liata ama laiseih thei lymâ hawpata Abeipa Khazohpa ta MECA awnaopa he byhnâ pie mawh sy. Amen



REV. JOSEPH MARA ZALEI THÂTIH CHYUPA



Joseph Mara Zalei cha Evan. Tliekhu (Hriepaipaw) nata Pinô Hiku sawchapaw liahpa châta, 1952 May 19, Lôvaitlâh liata a pihpa a châ. A laiseihna deikua Taubu khih liata a châ. 1982 April 14 liata Paw Nochhô nata Pinô Hezai sawchanô seihnaipa Sayama Veze (Lialaipi) nata ahnei eita, Khazohpa tawhta saw byhnâ St. Hratha, B.Com (final) a tahma yna Malaysia, Rev. Meilai (B.A., M.Div), atahma yna

Chakhai, St. Daniel (B.Th first yr. LTC) nata Ls. Ruby Sun Hiku (B.E Civil) zy ama hnei. Pastor raihria a chakao hai nota sapa chiehleina vâta operation taopa châ ta August 15, 1998, North Okalapa Hospital liata a chakaotyhpa Paw Khazohpa hnôhta maniah a pahasai haw.

Thaisohna âchuna cha Primary level achuna cha 1954- 1964 taih Taubu khih liata a chu. Py 5-7 taih cha 1964-1968 taih ta Daletme Middle sikul, Paletwa Toawntship liata â chu. Châ athaipatluapa atlyna liata â hlao. Py 8-9 he Mindat High sikul exam centre liata 1968-1970 taih a chu. Py 10 deikua Matupi High sikul liata a chu ta “A” list liata hlaotloh ta, cha cha Matupi High sikul liata “A” list liata a passed tua chaipa a vaw châ. Mandalay University achuna kô 1971-1975 liata B.Sc. (Math) ta a vaw patlô.

1977-1980 ta Burma Institute of Christian College, Insein liata B.D a vaw chu. 1985-1985 taih SAIACS Bangalore, India liata M.Th (Missiology) a vaw chu, cha cha Mara sawzy hry ta M.Th a vaw tua chaipa a cha. 1995 tawhta Korea râh liata Asian Center for Theological Studies and Mission, Seoul khihpi liata Doctor of Ministry a vaw chu. Marasaw zy hry ta D.Min a vaw kiah tuapa a cha nga nota vadua kawpa ta tlâh leina vâta Burma râh lâ a vaw palie pakhua haw.

Raihria a chakaonazy cha: MSA liata bietaihna vâta Mandalay University a vaw patlô tawhta Lialaipi Private High School 1975-1976 chhôn kôkha a vaw chakao tua chai. B.D achuna a vaw patlô tawhta MIC Hqrs. Lialaipi liata 1980 liata rai chakaona vaw pazao ta Probation Pastor pa-ipa a châ. Cha tawhta 1982 liata ordained pa châ ta Lialaipi Hqrs. Literature liata chakaosapa a châ. MIEC nata MIC apohkhana 1987 tawhta MEC Office Sabyhpi liata Executive Secretary (Admin) kôkha vaw chakao ta, 1988 liata MEC ta Private High School liata Head Master ta a vaw chakao. Burma rân school hawtizy lâthlô achhahna daihti a châpa vâta sikul cha khawpa a cha haw. 1989 tawhta Evangelical Mission (Myanmar) liata 1995 taih a chakao. Ano EM director a châ chhôn 1990 liata EM liata Office building pha kawpa a vaw chalei. MEC tawhta CCA pakhyi cha Srilanka liata a vaw hlao tua chai.

Rev. Joseph Mara Zalei he Marapa hry liata music lâchhâh byhnâ ato kawpa a châpa hawhta totâh to achu châbu papua ta, awnanopa liata pachunazy a vaw hnei tyh. Mara sawzy châta a khokhei chaipa cha sohna achuna liata tiama awpa he a cha. Khazohpa chakaona liata a khoh chaipa cha reithaina ta chakaona he châ ta, hla kha a satyhpâ miakha cha “Khazoh rônah chai se, a hmotaopa va” he a cha. EM Director ta a vaw chakao chhôn ta EM Office O phakawpa vaw padua thei ta my thei beih mapi. Ano pohpa y khao vei hra sala a chakaona vâta khâ eima thei tyh.



HAOSA LÂ CHAKA SUH VY

Rev. Dr. Zôdau

Biehmiapa

Khazohpa bie achu awpa ta Biehrai atlypa cha Maka 4:35-41 châ ta, a bie tlâhpipa ta “**Haosâ lâ chaka ei suh vy**” (4:35) tahpa a châ aw. Zisu ta a pachupazy thlihpi ru ngaitapa tawhta abohna hmono-âhpa a taopa phôhpa he namo hlüh via syulyu cha nama thei tyhpa kha a cha. He hmo ama tyhna su he Kalali tilaipei liata a châ. Kalali tilaipei cha 13x8 miles a laipa a châ. Chavâta Yangon khihpi laina tlu ta a lai awpa a cha. Mathai châbu 14:22-33 liata Zisu ti chô liata a chakana kyh hmô pita, “balyh cha ngiaka tawhta lahlapi lia y eita” a tahpa heta a kawh ngâsâ tahna a palâsa. Kaohropa lâ tawhta eima rei khiah, balyh chyhsa zy cha tilaipei thlihpi a vaw su nata ama rânâ su y vei tahna a cha. Kalali tilaipei chheipâhzy liata chyhsa hlüh kaw eita, achhâpa cha tilaipei he nga hnei hlüh kawpa a cha. Chavâta he Kalali tilaipei cha ama apatipavyna hro liata peimawh kawpa a châ. Cha hawhpa sôhtluana liata Zisu ta a chahraohna lymâ he zaw tahpa chhao maniah a pahnosa. Zisu Krista daihti liata khihchâh kyh reichhielienna system hnei mah vei ei. Chavâta thlihpi a vaw pathli awpa thliepadyna pahno vei ei. Cha hawhta eima khitlyna liata khapa ma eima tyh aw tahpa pahno chhielie theipa cha hra vei.

1. Haosâ lâ chaka suh vy!

Haosâ lâ chaka suh vy tahpa he khapa ma a rei khoh? Khapa yzie ma keimo châta ahnei? tahpazy pahno tua awpa a peimawh. **Haosâ lâ chaka suh vy!** a tahpa yzie pahno thei nawpa ta haosa râh ama chaka nata hmo yzie a chu awpa a cha. Cha kyh cha Maka 5:1-20 liata hmo yzie kyh he Zisu nata a pachupazy ama tyhpa hmo a cha. Mk. 5:1-2 “Tilaipei haosa ama tlô nata balyh tawhta pua eita, thlâ liata a pahrâ tyhpa thlahpa puapa ta a patupa chyhsa ama tyh. Cha chyhsa cha Zisu pahno ta, Khazohpa moh chhao a pahno hra.

A chô ta Zisu khapa hmah atao lei awpata ahawna ahnei. Chahrasala Zisu ta cha chyhsa chhôn liata a ypa thlapa puapa cha papua ta, thlahpa puapazy cha sahluhpi ama cha. Thlahpa puapazy cha cha chyhsa tawhta pua eita, vao chhôn liata a ngiah eita, vao cha a maluh ta 2000 ama pha. Cha zydua cha tilaipei liata tlasao haw eita. Cha tawhta cha chyhsa cha palôh sôh ngaitapa ta y ha ta, Dekapoli râh liata Khazohpa rônahna a phuahtuhpa lâta a lie haw.

Hmo yzie mopata **“Haosâ lâ chaka suh vy!”** tahpa cha Khazohpa moh parôhnahsana râh lâta vaw suh vy tahna nata a lyu aw. Cha chhao cha thlapa puapa ta a patu hawhpa chyhsa chô ta Khazohpa rônahna a palâsana chhao a cha. Chvâta **Haosâ lâ chaka suh vy!** tahpa cha Khazohpa ta a pachupazy cha Khazohpa ronahna hro pahmô awpata haosâ lâ chaka awpa ta a awpa a cha aw. Khazohpa cha eima haosâ râh eima tlô thei nawpa ta maniah awtuhpa a cha. Eima haosâ râh cha khapa ma?

Athaona 12:1-3 liata Khazohpa ta Abaraha cha Ur khihpi liata a y nga nota a aw. “Na râh tawhta nata, na heihnawh tawhta nata, na paw o tawhtapa pua la, râh ei cha pamosa awpa lâna chata sie teh” a tah. Abaraha châta a haosâ râh cha bietaihna râh a cha. Abaraha châta haosâ râh atlô nawpa ta awpa a châpa hawhta Khazohpa ta bietaihpa râh a tlô thei nawpata a chhitha hra. Izrael sahlao cha Izi râh liata kô 400 chhôn seichâ eita, Khazohpa ta cha seichâna tawhta Kana râh sahpiti nata khoti lona râh lâ siekhei awpa Mawsi cha awpa a cha. Izi seichâna râh liata a ypa Izrael sahlaozy châta ama haosâ râh cha Kana râh a cha. Kaohro lâ tawhta eima rei khiah, eima haosâ râh cha atahma ta eima hro ngapa hlâta hro pha viapa tahna a cha aw. He hmo yzie he Thâtihipha bie ta khâ a chhuahpa cha a cha. Thatihpha tahpa cha “thina tawhta thyuhei” a cha tahpa Pawla ta a reih (1 Kaw, 15:17-20). Zisu Krista thâtihipha eima chhopa cha Zisu Krista thyuheihna kyh a cha. Zisu Krista pathyupa a châ vei khiah eima ngiapâna cha hrao leipa a cha. Thâtihipha eima reipa chhao hrao leipa a cha a tah. Chavâta thina tawhta thyuheihna cha ta thâtihipha yzie miah a pachu. Mochaopa ta mopavâna cha ano châta thâtihipha a cha. Bysypa ta pheii ta a sie

theine cha thâtihipha a cha. Ti ta kresawti lâta a liena cha thâtihipha vâta a cha. Chahawhta, mochaopa châta a haosâ râh cha mopavâna râh a cha. Bysypa châta a haosâ râh cha pheita sie theine râh a cha. Ti châta haosâ râh cha kresawti a cha. Chavâta nama châta haosâ râh he khapa a cha? Tahpa a hiahri chy awpa a cha. Chyhsa ahyrai ta haosâ râh eima hnei chy awpa a châ.

Chavâta Khazohpa ta **Haosâ lâ chaka suh vy!** tahpa ta eima haosa râh tlô thei awpa ta maniah a aw nga tahpa ta a ngiapâ suh vy. Nama ta na tlô khoh kawpa duahmo kha nama châta na haosâ râh a cha aw. Cha râh tlai cha na tlô thei nawpa ta Khazohpa ta atamy he a cha aw nga. Khazohpa awna nathlie suh vy.

2. Atanoh keimo châta a la awpa

Mianona ta **Haosâ lâ chaka suh vy!** tahpa he atanoh keimo châta khapa akhohna a hnei? Rei chiehpa hawhta Khazohpa cha haosâ râh eima tlô thei nawpa ta maniah a awtuha cha a cha. Chavâta Khazohpa bie ta **Haosâ lâ chaka suh vy!** a tah tita, maniah a awtuha Khazohpa ta haosâ râh eima tlô thei nawpa ta **maophaona** ahnei tah awpa a cha. Ahyrai eima haosâ râh eima tlô thei nawpata maophaona ahneipa cha Zisu Krista a cha tahpa pahno awpa he a cha. Haosâ râh tlô thei nawpata project ataotuha cha Zisu a chapa vâta project ahneituha Zisu ta maophaona a hnei tahpa my lei awpa a cha. Balyh chô liata akhaipazy he pachutuhpazy cha ngyu eita, balyh hia-hâna dâh a thai kawpa sai ama châ aw. Chavâta azo tlamaw kaw ngyu eita thlihipi a vaw pathli nota ama boh thei nawpa ta amo ta ta ama zaoh. Cha cha Biehrai rotuha ta “Zisu cha balyh chao lâna chata lahuah a huahpa ta amo thlaha ta” tahpa a rona liata eima hmô. Thlihipi ru ngaitapa vaw pathli ta anodeikua Zisu cha maophaona la leipata amo thlaha a tah. Haosâ râh la chaka awpata a awtuha Zisu hmachha cha pamaophaohsa leipa eita amo thlahapa vâta “ama leidia daima haw.” Ama leidia daimâ tawhta Zisu maohphaoh khe awpa ta a haw eita, Zisu châta anaota ta thlih nata tilaipei cha ra ta ama chalih haw.

Keimo zydua he eima haosâ râh tlô awpata sie chy pita, tlô awpa chhao eima thlachhana a cha khai. Anodeikua haosâ râh eima tlô thei nawpata maniah a khokheituhpa nata maniah maophaoh kheh awpa Zisu he abochhâna châh eima my hâ tyhpa he chyhsazy moleina (mistake) a cha. Haosâ râh na tlô thei nawpata nama hlâ hmahta Khazohpa ta a khoh via. Biehraï miakha liata nama pha n'awpa ta plan ei hnei a tah (Zer. 29:11). Cha plan chhao cha eima tlô thei nawpa ta ano ta ei cha maophaoh aw a tah. Chavâta keimo cha Khazohpa liata a pahnie awpa he a cha. Thai kaw hra la, hnei kaw hra la, na haosâ râh tlô theina cha Khazohpa ku liata a y. Izrael mo châta Kana râh tlô thei nawpata Khazohpa maophaona a cha (Zawsua 24:12-13). Kheipangiah hmapa ta Amawri tlai kha chariah ei cha tu ei. Nama ku ta sa leipa khihpi liata nama y. nama lo leipa oli thei nata kre thei nama ni a tah. Mochaopa mopavâsana cha Zisu maophaona cha vei ma? Ti tawhta kresawti lâta â liena cha Zisu maophaohna châh vei ma? Zisu vâta deita ta haosâ râh na tlô thei aw tahpa my kha ei su!

3. Apathaotuhpa Zisu ta achhâna taih maniah a chhi aw

Miathôhna ta **Haosâ lâ chaka suh vy!** tahpa cha Zisu cha a pathaotuhpa a châpa vâta achhâna taih haosâ râh miah a tlôkhei cheingei aw tahpa a cha. Zisu ta reih ta, “Kei he athaona nata a chhana alpha nata ômekâ ei châ a tah (Biph. 1:8). He he Khazohpa ngâchhihna a cha. Haosâ lâta chaka awpa he a pachupazy ta ama pahruapa châh vei. Zisu tlai ta a pahruapa a cha. Chavâta nama châta haosâ râh tahpa ta thlah na chha ngapa tlô thei nawpa he Khazohpa palôh liata a y chiehpa châh ta, cha râh tlô nawpa ta a pahruatuhpa cha Khazohpa a cha tahpa my awpa cha vei. Khazohpa ta maniah a pathaokhei haw khih cha a chhana taih chhao miah a tlôkhei aw tahpa chhao a thei thlaha awpa a byuh. Khazohpa tawhta awna eima theipa he achhana taihta Khazohpa ta maniah a chhi tlai aw tahpa he a thei parei awpa a cha. Achhâpa cha Khazohpa leipa ta hrona he chichhih kawpa a chapa hawhta a sie thai leipa hawhta pahno awpa a cha.

Izrael sahlao cha Kânâ ama ngai nota molei haw eita, Khazohpa ta a palôh tlâh khao vei. Chavâta nama siena maih cha cha pahlao khao aw va eina a tah. Chatawhcha Mawsi ta nama hnôhta ei y aw tatlôh chita he hawhta hiehâhpa ta “keimo hnôhta maniah nâ pahlao lymâ khao leipa khiah he tawhna heta maniah chhitha khao kha” a tah (Pua. 33:15). A yzie cha nama leipa ta sie ngâh khao mapi tahna tla a cha. Chahawh tlai ta Kana mohparutuhpa 12 hry liata mo pa 2 Kaleba nata Zawsua deita he Khazohpa ta eima hnôhta a pahra lymapa vâta Kana râh cha keimo eih a cha ama tah (Malu. 14:8-9). Chavâta achhâna taih, haosâ râh taihta Khazohpa ta maniah a pathaokhei hawpa vâta maniah a tlôkhei cheingei hra aw tahpa my kha ei su. Khazohpa cha alpha nata ômekâ châ tlôh ta.

Biepachhâna

Khazohpa ta eima haosâ râh, Khazohpa parônahsana hro, achhuahpa tlôtheina hro, byhnâ atopa châna hro tlô thei nawpa ta Khazohpa tlai ta atahma he maniah a aw nga tahpa a thei thlâha suh vy. Cha hro tlô thei nawpa ta Khazohpa ta maophaohna ahnei tahpa chhao a thei thlâha suh vy. Khazohpa ta miah pathaokhei tyh ta, Khazohpa tlai ta achhana taih miah a tlôkhei hra aw. Chavâta achhuahna ta tlyma, achuna tlyma, khei hawhpa ta tlyma hro pha via eima tlô thei nawpa ta Khazohpa khoh ta, maophaohna hneita, ano tlai ta maniah a tlôkhei hra aw.

**Khazohpa khohzie hawhta chakaopa raihria
cha Khazohpa baona a phahla bei aw vei.**

God's work done in God's way will never lack God's supply.
(James Hudson Taylor)

MISSION GOLDEN JUBILEE KYHCHHI REPORT



Rev. Vazilai

Asu : Patheitlâh Local Church, MEC
Adaihti : Di 8-12, 2016
Biepipa : Khizaw Khaihpa nama châ na (Mt. 5:14)

Biehmia

Khazohpa ta “sie u la, photo pachupa ta tao teh u” tahpa biepiepa he Mara Evangelical Church chhao ta 1966 tawhta a vaw hria pathao haw hra. Eima thaisohpa vâta nata eima hneipa vâta cha vei. Kô 1966 râh chhoh Myanmar râh duahmo nata Mara râh duahmo pachâ tua rai! Khazohpa ngiachhiena vâta Marasaw zy Anoh chakao awpa ta atlypa eima châ he zaw! Cha hawhta eima hriapasana kô syngawh (Golden Jubilee) a hlao awpa ta Zaw theihpa Vazawlau, Bus, Tibaly, Motor, Motor Bi-Cycle, Phei zy ta Nôchhi, Nôtla, Maw nata Chhô tawhta ngiapâtuha Awnanopa sahlao zy cha runana, rairuna hlupi sie pahlie chyupa ta Mission Golden Jubilee Pakhyi cha ama kaw hlao chyua. Kô (50) chhôn eima hriapasana, eima piepasaina, ama hrona apie hawhpa zy taih ta eima chakaona he kyhchhipa ta, Abeipa reithai palyupalih awpa a cha. Chavâta Mission Golden Jubilee kyhchhi he khichhai, kihchhôn zydua maluh sâthoh hlei ta arônah kawpa ta ahmâpa a châ. Mission chakaona su lâ tawhta maluh 300 hlei ama tlô thei.

Mission Golden Jubilee ahmâna tlâhpi

Mission Golden Jubilee eima hmâna yzie cha: Nohkhana he Jubilee Pahyna nata alyna bie reihna Culture Dance ta a hmâpa chata Noh-nona he Hla nata Bie ta Khazohpa reithaina, palypalina Biehai achuna (Conference) ta ahmâpa châta eima hriapasana vâta

alyna bie reina ta a hmâpa a châ. Noh-thôhna noh he Ahlâna nata hmiala châta hmalana thiehpa hnei awpa ta a hmâpa a cha.

Jubilee Pakhyi Dyna

Jubilee pakhyi rônahpa dyna he Lailenpi Local KTP sahlaozy ta tiama kawpa ta ama chakao. KTP sahlaozy, Pathei Local Nôpawzy chhao nata Khumi tawhta Ngiapâtuha sahlao zy ta hawkaw liata lapa (Dance) ta ama dy pha kaw.

Tlôpakiza chata Chairperson ta Rev. Pahmo nata Rev. Khaibie zy ta chakao eih ta, ama chakao pha zie he zawpi ta ama reithai kaw. Speaker châta Rev. Cecil Robert (Australia) ta Khazohpa bie rei chakaona a hnei. Rev. Victor Ve U ta chibaih a buna nata hmiapahnosana a hnei. Reih paliepa châ ta, Mara reih ta Rev. Maiki ta palie ta, Myanmar reih ta Rev. Pahmo ta a palie. Chi to pho to, reih to ta, Khazohpa eima chhyna hmiatuapa a cha thlyu aw. Rev. Vazilai ta kyhchhi chhôn program yzie pahnosana a hnei.

Di 9, 2016 Chutyhnoh (Jubilee noh 1st na)

He noh he Jubilee Lôbô pahyna nata Culture dance ta ahmâna noh a cha.



My 5:30 tawhta Jubilee Daw ei syngawh tōpa châ ta Mydi 6:00-7:30 am ta “Kraws Tôh Pahyna” hneipa a châ. Rev. Lathai ta Chairman chakao ta Rev. Thlachhau ta a pahy. Kraws Tôh he Feet 26 sie ta (a lapa 23 ft a châ), Pe 2 nata khophie akawhpa châ ta ama bōna tlâh he Khazohpa tlâh tahpa ta moh paphaopa a châ. Rev. Khaomi ta bietana pachhohpa reih ta “Zisu Kei Beipa a châna” tahpa hlasa khai ta Rev. K. Zahne ta byhnâ awna a hnei.

My 9:00am ta zawpi su thōhta a pahmaopa ta Meithei kah khai tawhta Jubilee Tlâh- Aw Kheihpa phuah lymâna chô ta Jubilee Lōbô lâ pangai chyupa a châ. Jubilee Lōbô lâta pangaina liata Flag zy chabahpa ta, nata tlâh awpa ta pangaipa châ ta khihpi he Jubilee ao ta a pahnie kaw. Eima lyna ao he Khazohpa ta a thei cheingei aw. Beiparisoh he Mission sohnaw a-ipa ta eima tao lymâ aw tahpa bie he ngiapâtuahpa Awnanopa sahlao zy ama ly kawna a châ.

Jubilee Lōbô pahyna liata Rev. Dr. Zōdau ta Chairman patuh ta, Rev. Satu Ve U (Moderator, MEC), Rev. Dr. Lai-u Fachhai (Moderator, ECM) Rev. Tha Htwe (Mro Mission) zy Jubilee Lōbô pahyna ama hnei. Lōbô pahyna liata Biereina pachhopa he Rev. T. Salaw (ES i/c E& M, ECM), Rev. Rakhai(ES i/c E & M, MEC) zy ta hnei eih ta Missionary hmiatuapazy lymâ piena hneipa chata Rev. Dr. L B Siana ta a cha kao. Mission field liata ama hrona a piepa zy he my theipa châ vei.

Dr. Sasa tawhta Khumi Biehraï he Khumi Evangelical Association (KEA) sahlaozy lâta lymâ piena a hnei. MEC Local Church zydua he Mara Biehraï nata Hlabu sâkha chyua piepa a châ hra. Hlapy ngiapa ta Khazohpa reithaipa zy cha ECM Jubilee Hlapy nata MEC Jubilee Hlapy (1) zy ama châ. Vaituhpa thlahchhana he Rev. Dr. Hc. Biezo ta chakao ta “Krista Pheisai sahlao” tahpa hlasa khai tawhta Rev. Haidau ta byhnâ awna a hnei. Lōbô pahyna a chha tawhta nothlahpa lana he hnei lymâpa a châ.

Eima paha maih kaw ta “Rev. Mathao Atheithlâhna” ta taopa thopi he noh charei do lymâ tyhpa a cha. “Rev. Mathao

Atheih-thlâhna Thopi” he Pupa Vabei Kyhpachâ nata chhônkhâ ta a chhuahdy ei ta, he châta Rev. Chhaza ta thlahchhana a hnei.

Zubili nohkhanâ za he Praise God through Culture (Culture dance) thyukhei ta Khazohpa palyupalihna ta a hmâpa châ ta Mission field chyu tawhta ama Culture dance chyu ta Khazohpa ama reithai chyu. Culture dance a hmâ zâ ta, Chairperson chata Rev. Biehlo nata Rev Maiki zy ta chakao ei ta, biereihna pachhohpa a hneipa zy cha Rev. Vabeilua, Rev. Nokha, Rev. Reha, Dr. Sasa, Pupa Mauthieli (MEC, Australia) zy ama châ. Khazohpa he eima hry liata a phualuah tlaina tahpa he eima paleih ta rei tiahpa châ vei.

Di 10, 2016 Pachynoh (Jubilee noh 2nd na)

He noh he Hlana ta Bie ta a hmâna hneipa châ ta Conference nohta ahmâpa a châ.

Mydi 6-7:30am Thlahchhana ta pathaopa châ ta Chirman chata Rev. Thavaw ta chakao ta Biehrai pachuna he Rev. Dr. Hc. Biezo ta a hnei. Thlahchhana he Rev. Dr. T. Zawsi (ECM) ta a chhitha. Hlapy ngiapa ta Khazohpa a reihthaipa cha MEC Jubilee Hlapy (2) a châ.

10:00am tawhta 3:00pm taihta Conference ta a hmâpa a châ. Conference chhithatuhpa ta Rev. Victor Ve-u ta chakao ta Pachuna he Rev. Dr. Zodau nata Rev. Dr. L.B Siama, Mch. M. Vahnei zy ta ama hnei. Ama pachuna response he Rev. Maiki ta hnei ta zawpi reipahmaohna hneipa a cha. Mission Golden Jubilee khô la tawhta chakaona thiehpa nata thaza thiehpa ta chakao lymâ awpa ta reipa a châ. Byhna awna he Rev. D. K Hiechhai ta a hnei.

Apakhyna liata Rev. Vazilai nata Pastor Phuhe ta Chairpersons chakao eih ta, Rev. Dr. Lai-u Fachhai ta thatihpha bie phuah-na a hnei. A biereihpa pha zie ta Khazohpa moh parohnahsa ta zawpi ngiapâna a palaiseih sa hmeiseih. Za ta Hla nata Bie ta a hmâ pazao lymâpa chata, Hlapy ngiapa nata Mo pakha hlasana zy ta Khazohpa reithaipa a châ. Bie pachutuhpa zy cha Rev. Nokha

(MEC), Rev. Vabeilua (ECM) nata Rev. Beirona (AGS, CCIM) zy ta ama chakao. Byhnâ awna he Rev. Sitlô ta a hnei.

Di 11, 2016 Khazohpa Noh (Zubilee noh 3rd na)

Jubilee Beipa Tlâhkhai Ahlyna nata Ahlâna noh ta a hmâpa a châ. Mydi thlahchhahna ta a hmâpa châ ta Pino Shwe Nikhai ta chhitha ta Rev. Lechau ta Thâtihpha pachuna hnei ta Thlahchhana he Rev Lathai ta a chhitha. Rari KTP ta Hlapy ta Khazohpa reithaina ama hnei.

My supipa apakhyna liata Abeipa Tlâhkhai Jubilee Akaona Tlâhkhai a hlypa a châ. Apakyhna liata Chairman châ ta Rev. Sitlo ta chhitha ta Rev Dr. M. Zakonia ta Khazohpa Thatihpha bie phuahna a hnei. Mission chakaona liata thyutlia thaisohna a hnei viapa zy peimawhna tha ta maniah a pahmôsa. A pha eima ta kaw sai. Rev Haidau ta Vaituhpa thlahchhana hnei ta Rev. Sachho ta byhnâ awna a hnei. Jubilee Beipa Tlâhkhai a hlyna hneipa a cha. Chakaotuhpa ta Rev. Satu Ve-u nata Baotuhpazy chata: Rev. Hrema & Rev. Khathai; Rev. Thavaw & Rev. Bukwe; Rev. Se-u & Rev. Maung San; Rev. Beirah chhh & Rev. Pyi Win; Rev. Beichhitha & Rev. Aung Than Zan; Rev. Khaomi & Rev. Sin Lone zy ama cha.

Za he a hlâna nata a pakhyana hneipa a cha. Cha liata Chairman chata Rev. Lathai nata Rev Se-u zy ta chakao eihta, Rev. Dr. LB Siana ta Khazohpa thatihpha phuah-na a hnei.

“Zisu Kyhpacha no-ah chhah azaw ngiana reithaisi” tahpa hlasapa ta zawpi ahlâna hneipa a châ. Eima hlâna daihtih liata Electric mie khawpa chata eima zydua ta Candle he pakhaipa châ ta Jubilee tlâh-aw kheipa chhao reina hneipa a châ. Eima palôh he thapi ta mia hria ta Jubilee kyhchhah eima patlôna climax cha eima tlô hmeiseih. Khazohpa moh he reithai via rilipa châ lymâ mawh sy! Amen. Byhna awna he Rev. Sa E Hmo ta a hnei.

Chareipakhyna he Rev Rakhai ta chhitha ta hla nata bie ta a hmâ pazao lymâpa a châ. Cha liata eima hlâna cha hmô theipa ta tao awpa ta Evan. Ebi ta mia pahao ta eima hneipa sôh zy thyu

pakhypa a châ. Eima thyu pakhypa sôh cha Ks. 900000 (Tei 9 hlei) châ ta, chysia nata hmodâh hropa zy chhao ta Khazohpa lâta eima hlâ chy.

Chareipakhy zâ ta alyna bie reina he ama hnei chy. Alyna bie areihpa zy cha Pino Sichi (Khailono) (MEC, Indianapolis, USA), Rev. Thlachhau, Rev. Reha, Mch. Robie (Dawlei), Rev Maw Thang (Lemro)zy ama châ. Hlapy nata mo pakha hlasana zy ama hnei chy hra. Eima zydua ta eima ly zie he tha ta châ ta kychhhih chha awpa chhao pasai chhih vei.

Lymâ piena nata hmôpa

Mission field chy he Kaobie khua (9)pa sâkha chy Presbytery No. 1 tawhta lymâ piena ama hnei. Ama ly zie he thata a cha kaw dia. Khazohpa ta rôhna hna to sala byhnâ he Awnanopa châta cha lymâ se!

Kyhchhih chhoh thyupa sôh zydua Ks. 400000/ (Tei 4 hlei) a châ. Mission Golden Jubilee châta eima zydua thaza pahmaohpa ta eima hria chyupa vâta eima ly kaw sai. Hmiala chhao eima taotheipa eima thaza zy he pahmao via lymâ su! Mission Golden Jubilee sôh pahmaopa zydua tawhta Paletwa liata KEA Office, Sabyhpi liata Mission Quarter, Patheitla liata Jubilee Quarter zy he o ta aypa chata a hropa hmo didiahpa zy chhao a y hôlô.

Patheitla Local Church zy byhnama tona

Patheitla Local Church, MEC ta kychhhih a chhuahdypa vâta Kôvei a pha ama tah. Ama piepasaina he Khazohpa ta byhnâ a pie cheingei aw. Ama o lyu sana nata taona he a pha hmeiseih.

Ama hriapasa kaw

Mission Golden Jubilee châta sôh nata hneina, thlahchhana a pahraopa zydua eima chaly hmeiseih. Khazohpa ta byhnâ tlao cha vao hri mawh ei sy! Ngiapâtuha Awnanopa sahlao eima zydua eima hriapasa chyupa vâta hlao tlo theipa a châ. Paletwa Local Church nata Salyu Local Church khichhai tlôna sie vawna ama


patôhpatiahpa hela aly leitheipa châ vei. Mission Golden Jubilee vâta eima zydua hriapasa chyu pita eima zydua Khazohpa ta tlaomania a thei chyu mawh sy!

Alyna bie hlâna nata pachhana

Marasaw ahy hma ta kyhchhih chhôh paripa ta hmôpa y vei. A rôhnah ei ta kaw. Security ta a chakaotuhpa MTP sahlao nata Steward zy chhao nata chyhsa to ta azi palôh phao ta ama thaza nata ama soh-na pachhihpa ta ama chakao chyupa hmô nata ei ly via pachai heih. Jubilee ahmâna Byureih he ngiaryh chhih kawpa ta Mch. Zasaw chhihpa ta ama taopa he pha ei ta hmeiseih. Noh tato ta Jubilee Chiamie papuapa châ ta apha kaw. Editorial Board zy lâta eima lyna tha ta a châ hra. Jubilee Chiamie ta mia pachupa he eima hmâ pazao lymâ awpa a pha hmeiseih. Jubilee châta a vaw piepasaipa nata a vaw tlôpa thlahchhapa nama zydua vâta kyhchhih he a hlao tloh kawpa ta pachhapa châ ta eima chaly hmeiseih. Khazohpa ta byhnâ cha pie lymâ chyu mawh ei se! Mission eima chakaona he kô 50 khôlâ kaw sie lai hawpi ta eima vaw chakao pathaona daitih 1966 liata Myanmar sawhkhâ duahmo mopa ta reipa a cha khiatala Myanmar râh liata Mission chakaona pathao tua chaipa zy liata eima y hra thlyu aw. Khazohpa ta Marasawzy he Mission chakao hra awpa ta mia a tlypa vâta Mission Golden Jubilee khô lâ taih chhao ta eima chakaona patheipa ta hmia to lymâ sila eima thaza zydua pahmaopa ta Abeipa chakao heih ei su. Mission chakaona he bâhsai leipa ta sy!

Note: He liata palasapa he tlahpipa chata aki viapa ta pahno khoHPa zy cha MEC Website www.marec.org. liata charei theipa a cha. VCD liata chhao akipa ta mo awpata ahawpa nama cha.

MARA HOLY BIBLE DIAMOND JUBILEE KYHCHHI LIATA MY LEI AWPAZY



1. Mara Holy Bible Diamond Jubilee (1956-2016) cha April 29-30, 2017 ta Chin State khihpi Hiakha liata taopa a châ. Hiakha khihpi liata taona chhâpa a hnei. 1) Biehräi hneina he châ nata chipho azaona ahnei. Mara Biehräi eima hneipa he Chin chipho 53 hry liata Marapa cha ahlaopa ama châ tahna palâsa awpa. 2) Mara Biehräi eima hneina cha Chin literature pahneirôhsana miakha a châ tahpa palâsa awpa. 3) Mara Biehräi he MEC py eih châ leipa ta py to liata a ypa Marapa zydua châta a châ tahpa palâsa awpazy a châ.



2. Diamond Jubilee Bietlâh cha “Khazohpa Bie: Ato zydua Thabypa (The Word of God: Foundation of All” (Zhn. 1:1) a châ. A tlyna chhâpa cha eima missionaryzy ta Mara Biehräi ama

- palie tua chaipa cha Thâtihipha Zawhana châbu a cha. R.A. Lorrain ta Biehrai palie tua chaipa cha Zawhana 1:1 he a châ aw tahpa apyna chôta Mara châ ta Khazohpa bie roh tua chaipa a châpa vâta atlypa a cha. Chavâta Khazohpa bie he Marapa châta a miakhana nata ato thabya vaw châ parei mawh sy.
3. Mara Holy Bible Diamond Jubilee kyhchhi patôhpatiana kyh liata reipasaona hluhpi eima tyh. Lorrain ta Mara Biehrai a palie nota reipasaona atyh ta lyurâhripa nata ama tupa nata a yzie a lyu. Reipasaona eima tyhpazy cha: 1) Kyhchhi patôhpatiana kyh liata zawpi palôh châ âh leinazy; 2) MEC nôpaw chaipa Moderator, GS, ES Education nata nôpaw hruapa thokhazy vaw tlô thei khao leinazy; 3) Mara râh lâ tawhta ahlaow awpazy avâ sua tuna vâta lâpi pha khao leipa ta rairunazy, 4) ECM lâta hruapazy vaw siena awpa permit kyhzy liata reipasaona a ngiah. Anodeikua R.A. Lorrain ta reipasaona a pahnie hawpa hawh tlai ta kyhchhi patôhpatiana kyh liata reipasaona a vaw ypa zydua Khazohpa ta maniah pahnie pa khai haw ta, aly ngaitapa ta kyhchhi eima tao thei.
 4. Khichhai dyna he Hiakha local church nata Hiakha liata Marazaw zydua ta maophaona la ei ta, MEC Hiakha achhyna o building patlô mâh leipa liata khichhaipa zydua zapati achhuadypa ta ama dy. ECM tawhta ECM nôpawpa Rev. Thylua Hlychhy (Moderator) nata Rev. Nc Vabeilua chhitha ry liata Rev. Phosa Chozah nata ECM Hlapy nata Bible for Myanmar ama zydua mo 38 zy ama vaw hlao. Mara râh lâ tawhta Pastorzy, Hyutuhpazy, Awnano machâzy nata Sabyh hlapy sahlaozy ama zydua ta 100 rachhoh ama vaw tlô. Yangon lâ tawhta Pastor nata KNP sahlaozy mo 15 rachhoh ama vaw tlô. Khichhai hrua eihpazy hry ta a vaw tlô theipazy cha Rev. Mann Pamasta (MCC GS), Rev. Dannis Ngun Thawng Mang (President, CBC Falam) nata St. David Lai zy deita ama châ. Khichhai zydua cha Hiakha liata Marasawzy ta ama o liata maniah eima patlôsa. Ama chôta eima ly ngâsâ.

5. Main celebration he 2:00-5:00 pm, April 29, 2017 Carson Hall, Hiakha liata taopa a cha. Rev. Dr. Zôdau nata Pihnô Neibu zy ta Masters of Ceremony ta aduah eita, aryla hawhta programme ama siekhei.

- (1) Pathaona thlachha : Rev. Dr. Hraki (Mara Baptist Church, Hakha)
- (2) A naohna biereina : Rev. Victor Ve U (AGS, MEC)
- (3) Abeipa reithaina : MEC Hlapy
- (4) Kokheina Biereina : Pu Pau Lun Min Thang (Minister, Social Affairs, Chin State Government)
- (5) Khokheina Biereina : Rev. Mann Pamasta (GS, MCC)
- (6) Abeipa reithaina : ECM Hlapy
- (7) Paper reina : M. Vahnei (Chairman, AMLC)
- (8) Mo pakha reithaina : David Lai
- (9) Bietaena reina : Rev. NC Vabeilua (President, Bible for Myanmar)
- (10) Khokheina beireina : Rev. Dennis N. Thawng Mang (President, CBC, Falam).
- (11) Mo pakha reithaina : Mr. K. Beilôpha (ECM Hlapy member)
- (12) Alyna bie reina : Rev. C. Thaulai (Biatuhpa, YMEC)
- (13) Zawpi reithaina : "Hy, rôhnah chai"
- (14) Byhnâ awna : Rev. Nôkhâ

6. Jubilee Dinner hneipa a cha. He Dinner he Carson Hall liata main service hnei khai tawhta pazao pâpa a châ. Seih sa nata Vao sa chaleipa ta Carson Hall liata beihchho athaipazy pachhosapa châ ta a pahâh kaw. Chyhsa mo 700 nie awpa hnabeiseihpa châ ta, anodeikua, Dinner adôh theipa maluh 800 pha pita niedo daityna y hlei vei. **30 April 2017**, My supi a pakhyna khai nata zawpi zydua châta Pupa Rôche nata chhôkhah (Australia) tawhta ama paw Km. Lithâh (late)

- atheithlahna nata Jubilee alyna châta a chakuapa nata viachhâ ta zawpi zydua châta ama pie. He hawhta hmopha taona vâta Khazohpa byhnâ eima awpa hra.
7. Kyhchhi liata Mara Biehrâi nata Mara Krizyhpâ Hlabu asaipa ta raina programme hneipa a châ. He Biehrâi a saipa ta rai thei awpa ta sponsor tuhpa zy cha Bible for Myanmar nata Dr. Sasa zy ama châ. Bible for Myanmar tawhta Mara Holy Bible copies 270 nata Krizyhpâ Hlabu copies 470, nata Dr. Sasa tawhta Mara Holy Bible (Leather cover) copies 300 zy Jubilee alyna châta maniah ama piepa vâta ama chô liata eima ly ngaita kaw.
 8. Chyhsa thokhazy châta Palyupalihna Ryuchâ hlâna hneipa a cha. Ryuchâ piepazy cha: a. ECM Hlapy, b. MEC Hlapy vyuhpa ta a duahpa Sabyh Hlapy, 3. Mara Holy Bible 270 nata Krizyhpâ Hlabu 370 a saipa ta a raituhpa Bible for Myanmar, 4. Mara Holy Bible bu 300 a saipa ta a raituhpa Dr. Sasa (HHS), 5. Hlasa thaipa St. David Lai, nata 6. Decoration liata athaina ahmahtuhpa Pinô Lai Mary zy ama châ.
 9. Mara Holy Bible Diamond Jubilee kyhchhi he Hiakha khihpi liata o to tawh chhao ta ama hmô thei nawpa ta TV tawhta live ta pathliepa a châ. Cha liata TV Channel hmâpazy cha Ronald Vision nata T.T Vision zy ama châ.
 10. YMEC Yangon KNP ta decoration maophaona la eita, Union level ta tobipa a chapa vâta Hiakha Carson Hall avaihtuhpa ta cha “atahma taih Carson Hall liata ama vaw taotyhpâ hry ta tobina (decoration) a ngia chaipa a cha chy” a tah.
 11. Chin Sate nata Mizoram State liata Khazohpa Biehrâi Pathaihpâ a vaw hnei tua chaipa eima châ chhâna he Sayakyi Bawi Hu ta reih ta, “Marapa ta he hawhta Chin State liata Holy Bible a vaw hnei tua chaipa a châna chhâpa he Khazohpa ta Marasawzy he Chin râh liata Biehrâi chhoh liata Khazohpa bienyupa nata bieparu zy thuapapua ta a phuahtuh awpa ta maophaona ahneipa nama châ tahpa ei pyh” a tah.

HAWTIZY PACHUNA PHAPA

Pro. Pastor Sikhei

Palôhrupa phapa ahneipa nata palôhrupa lata hneirôhna ahneipa chyhsazy he chi nata pho padua nawpa nata Khazohpa khinarah pakawh n'awpa liata thlalôh-hmilôh maniah ama pachhih kaw tyh. Chahawhpa palôhru phapa ahneipa saw chapaw nata saw chanô ahneipa nôpaw zy he uah-vâ ama chhih hmeiseih. Hmialâ daihti liata Mara chhôhto, khito, Mara râh nata Khazohpa râh padua laih nawpa châta, cha hawhpa palôhru phapa ahneipa hawtizy hluhpi eima hneithei nawpa châta hmalana hneipha via lyma awpa he eima byuh hmeiseih. Cha hawhta hmala nawpa lathlâh hluhpi a y awpa hry liata hmala awpa hmo miakha ei vaw palâsa khoh ngaita kaw.

Hawtinahzy palôhrupa eima mo tita ama palôhrupa chhôn liata aruapa hluhpi y ta, cha aruapa chhôn liana chata hmo phapa deita he khô ta pabi awpa apha ngaita kaw. Palôhrupa chhoh liata hmophapa a y haw khiah tacha, a bierei-kathla zy pha awta, a hmotaopazy pha heih awta, achhuahnazy chhao apha aw tah theipa a cha. Maniah chipho hropazy hawhta taka-phusa, sôh-dawh zy hnei thai vei hraw sila, palôhru phapa hawtizy hluhpi eima hnei thei thlah ha pa a cha khiah ta cha, nôpo kaw tah ngiachhi awpa y aw vei. Tanoh khizaw duahmo he eima mo nga nata cha, palôhru phapa nata hrozie phapa saw chapaw zy, saw chano zy ahneihluhpa nopawzy tluta uah-va awpa y aw vei ei tahpa ei pacha tyh. Khipipa lia chhochhi cha eima sawnahzy he ama palohru pha khao kha se, ama hro ado khao kha se, atakhiah ta cha nôpawzy châta amo hmata amo thei khao awpa châ vei.

Hlano manô-mapawzy daihti liata cha, hawtinahzy he amo khodâh ta hawhta ama chhorei (control) thei hawpa vâta, hawtinahzy chhao ta a ma nô nata paw riah chi kaw ei ta, kaokha lâta cha apha ngasa. Anodeikua, khizaw thaina achuna nata Biehrail he a ma hnei mah leipa vâta hawtinahzy pachuna he systematic

(*sanitachia*) kawpa ta pachuna ama hnei thei mah leipa vâta, ahla nata abie tata ama pachu lyma tyhpa a châ. Chahrasala, tanoh keimo chhâ liata deikua cha, khizaw thaina achuna avaw y hleikhô ta Biehrai chhao eima hnei haw bâ pa vâta hawtinahzy he pachuna phaviapa eima pie lyma thei awpa a peimawh ngaitakaw.

Sawnah pachu awpa cha nôpawzy rai laichai pa a cha. Chahrasala, khapa e eima pachu aw tahpa kyh he pachâ hialia awpa abyuh. Krizyhpâ eima châpa vâta Biehrai he pachu awpa a cha tah ei sila, reichhei aw mapi. Chahrasala, Biehrai he chha kawta, a kawh kaw hlei ta abô nata châh a y khai heih. Marapa nôpaw zy pi cha eima khihsa-tôtunakyhzy vâta mydi awkhko tawhta za notla na zo hmyhlyh hana taita rai ahriapa eima cha heih. Chahawpa duahmo liata eima duapa vâta Biehrai pachu awpa tahpa cha, achuna (Curriculum) pha kawpa eima hnei veikhiah, rai nao kawpa cha khao heih vei. Chavâta, Maranôzy rai ahriachaipa chhao ta ama sawnahzy phakaw pa ta Biehrai ama pachu thei lyma nawpa châta Pachuna (Curriculum) pha kawpa tao ta a châbu taihta papua aw pa eima byuh hmeiseihpa a châ. Krizyh ko-110 atloh hawpa Awnanopa eima châpa vâta he hawhpa hmo he program pha kawpa ta eima tao theipa a cha khia ta cha, Awnanopa pitlopa eima cha zie ala pasia via awta Awnanopa pha viapa la ta chhao maniah a chhitha hra aw tahpa beiseihna tha ta eina pahnei sa.

Eima nôpaw chana duahmo he eima pacha suahluah khiah ta cha nôpawnahzy pi, a via pachaiapa ta nôzy pi he hawtinahzy palôhrupa ataotuhpa, a chamieh-chamâ theituhpa (Heart-shapers) eima cha. Chahrasala, eima sawnahzy palôhrupa tao thei nawpa châta khapa chhaichhi hma ei sila palôhrupa phapa, palôhrupa hneirôhpa, palôhru kawhpa ama kaw hnei thei aw tahpa cha pachâ via laih lyma awpa eima byuh hmeiseih. Biehrai he athaona tawhta achhana taih ta eima mo nga khihta cha hawtinahzy palôhrupa taonawpa pachuna biezy, phopa zy hluhpi hmothei pa a cha. Biehrai bie he khazohpa bie achâ pa vâta zaozi koh nata hah hla taita atiah via tahpa eima hmô heih. A yzie cha, hawtinahzy palôhrupa tao laih nawpa châta hmâ awpa Châbu phachaipa a cha.

Tanoh ta eima pachuna he pha vei ma, tahpa cha mawh sala cha apha kaw eima tah aw, chahrasala, a systematic viapa ta tao awpa eima byuh tahna he tlaao eima rei khoh pa a cha hri.

Chakhiah ta cha, hawtinahzy pachu pha via nawpa châta abyuhpa achu awpa (curriculum) nata châbu cha ahy maw patôhpatia aw ta hmalana ahnei aw tapa he pachâ awpa abyuh heih. Tanoh Marapa eima duahmo saipazihpa ta reipa châ mawh sala, Awnanopa ta pachhuhpanoh thei sala, hmalana hneithei mawh sala apha chai awpa ta ei pachâ tyh. He rai he Awnanopa rai cha ta eima Zisu Krista mission rôhna chaipa chhao a cha hra.

Achhana liata eivaw palâsa khoh kawpa cha, tanoh khizaw duahmo nata Awnanopa duahmo eima mo nga nata hmo toti eima taopa mai liata, systematic tata atao thai laihpa, hmalana ahnei laithaipa Awnanopa nata phu nata py zy he ama hmasiena a chatlie via lymapa ta hmo theipa a cha. Hmiala daihti liata eima Awnanopa hmasie via thei nawpa châta cha se, eima Marah râh hmasie via lyma nawpa châta cha se, eima khih nata tlâh, eima Myanmar râh taihta nata Khizaw kaoki taihta hmasie viana lâta eima pangai via thei nawpa châta, keimo chhao he hawtinahzy palôhrupa pha viapa eima pahneisa thei via nawpa châta Biehrai liata a pachi-a pamoh viapa ta tiama ta ahrie pa laih awpa eima byuh hra.

Eima Awnanopa châna liata hawtizy he Krista palôhrupa phapa ama vaw phao via thei nawpa chata achô lâta palâsapa hawhta tao theipa cha sala, Bisozy 22:6 liata eima hmôpa “Hawtipa cha a sina awhpa lapi liana chata pachu ula, a machâ tita sisai awh vei” tahpa bie he eima Awnanopa châna liana he ta avaw ki via lyma awpa ta beiseihna tha ta eina pahneisa hmeiseih.

CHAKAOTUHPAZY TAOKHEINA



Machâ Hrâlei
(Sabyh Local Church)

Machâ Hrâlei he June 1, 1940 ta pih ta, Khazohpa ta maophaona a pavaosapa rai zydua ahria khai tawhta February 26, 2017 noh Khazohpa hnohta maniah a pahasai haw. High School Final he 1965 liata vaw passed ta Sikul pachutuha, Primary Head Master zy ta kô 42 chhôn pachuna rai a vaw hria. Awnanopa liata eima bôchha kawpa pakha a châ. June 14, 1978 ta Khichhoh macha pa-ipa châ ta, Awnano Machâ ta February 17, 1985 ta chahnaopa a cha. Awnanopa liata local level nata Assembly level ta nôpaw châ ta, a eih viapa ta Assembly auditor nata Presbytery No 3 vyuhtuapa ta Office Council memberzy a vaw chakao. A chakaona zy vâta my theipa châ vei.



Machâ Raikô
(Chakhai (N) Local Church)

Machâ Raikô he Chakhai (New) liata a laiseihpa a châ. Khazohpa ta a pavaosapa raihria zydua ngâchhih kawpa ta hria tyh ta, a sapa kô 69 apha hai nota September 15, 2017 noh ta Abeipa Khazohpa hnôhta maniah a pahasai haw. Ano he Village Council liata 1970- 1988 taih kô 18 chhôn khih nata râh châta rai a vaw chakao. 1989 ta Awnano Macha ta chahnaopa a châ. 2012 tawhta Chakhai Old Local Hyutuha ta term kha a vaw chakao. Hrochhôn Khazohpa bie Zhn. 3:16 he a châ. He hawhta khih nata râh, Awnanopa kyhpachâna zy palôhrupa ahneipa cha a siesaipa Awnanopa nata chhônkhâ hro liata hroh lyma mawh sy!



Machâ Vâdô
(Dawlei Local Church)

Machâ Vâdô he March 27, 1953 ta pih ta, Khazohpa ta tovyuh a piepa raihria zydua ngâchhih kawpa ta a chakao khai tawhta September 30, 2017 ta Abeipa Khazohpa hnôhta maniah a pahasai haw. Ano he 1980-1984 taih Dawlei KNP branch chhithatuhpa ta a vaw chakao. January 1984 liata Awnano Machâ châta Rev. Nokha ta Tisi Presbytery liata a chahnao. 2016-2020 term chhôn dawlei local Awnanopa liata Hyutuhpa ta Assembly liata pa-ipa a châ. Awnanopa liata KNP chhithatuhpa, Khichho Macha, Awnano Macha nata Hyutuhpa duahmo ta awnanopa a chakaona vâta eima thei parei aw.



MARA EVANGELICAL CHURCH
MISSION GOLDEN JUBILEE
1966 - 2016



JUBILEE TLĀH-AWKHEIPA (Jubilee Slogan / ယူဘိလိယံကြွေးကြော်သံ)

- Mara Awnanopa ta a pasâhsa chaipa ... Thâtihpha Chhona
The utmost value of Mara Church ... Heralding the Gospel
မရာအသင်းတော် အထွတ်အမြတ်တန်ဆိုးထားရာ ဧဝံဂေလိတရားဟောကြားခြင်း
Mara Awnanopa ta a pikheipa ... Thâtihpha Chhona
The inceptive uniqueness of Mara Church ... Heralding the Gospel
မရာအသင်းတော် မင်္ဂိုယ်လက္ခဏာ ဧဝံဂေလိတရားဟောကြားခြင်း
Mara Awnanopa ta âlyna chaipa ... Thâtihpha Chhona
The Joy of Mara Church ... Heralding the Gospel
မရာအသင်းတော် ဝမ်းမြောက်စရာအကြောင်း ဧဝံဂေလိတရားဟောကြားခြင်း

Zisu Krista Thâtihpha - Eima chho lymâ aw.
The Gospel of Jesus Christ - We will constantly proclaim.
ဧရစ်တော်၏ ဧဝံဂေလိတရား အစဉ်အမြဲဟောကြားမည်။

JUBILEE BIEPHUAHPA (Jubilee Declaration / ယူဘိလိယံကြေညာချက်)

- Marapa khaihna - Krista Thâtihpha
The Light of the Mara - The Gospel of Christ
မရာတို့၏အလင်း ဧရစ်တော်၏ ဧဝံဂေလိတရား
Awnanopa ahra - Thâtihpha chhona a sapapuapa
The revival of the Church - Giving birth the spirit of Mission
အသင်းတော်နိုးကြားခြင်း သာသနာဖြူစိစေးဖွားစေပ
Mara Awnanopa - Thlahpa tha a pasapa
The Mara Church - Having Passion for the soul
မရာအသင်းတော် ဝိညာဉ်စေတနာရှုကရုဏာထား
Mara Awnanopa - Thâtihpha vâ hriapasapa
The Mara Church - Laboring for the Gospel
မရာအသင်းတော် သာသနာ့အရေးအားထုတ်လှုပ်စေမည်
Marapa byhnâ tona - Thâtihpha chakaona
Cause of Blessing of the Mara - Serving the Gospel
မရာတို့ကောင်းခြင်းမင်္ဂလာခံစားရာအကြောင်း သာသနာဖြူခြင်း
Marapa apôhkhana - Thâtihpha chhona
Unity of the Mara - Heralding the Gospel
မရာတို့တစ်လုံးတစ်ဖြစ်စေခြင်း သာသနာဖြူလှုပ်စေမည်
Mara Awnanopa - Thâtihpha a chhopa
The Mara Church - Missionary Church
မရာအသင်းတော် သာသနာဖြူစေသောအသင်းတော်

JUBILEE AHLĀNA (Our Commitment / ယူဘိလိယံအမိန့်ဌာနိ)

Krista Awnanopa eima padua lymâ aw.
We will further build the Church of Christ.
ဧရစ်တော်၏အသင်းတော် ဆက်လက်တည်ဆောက်မည်။
Pachhana kipa Thâtihpha eima phuah lymâ aw.
We will constantly proclaim the fullness of the Gospel.
ဥသန်ကယ်တင်ခြင်းတရား ဆက်လက်ဟောကြားမည်။
Beiparisô he Mission sôhnawh a-ipa ta eima tao lymâ aw.
We consecrate rice bowl for God's Mission.
ဝမ်းစားဘဏ္ဍာအား သာသနာ့ပုံစံဖြင့်အမြင်ဆက်လက်ဆက်ကပ်မည်။